

eos prohibere quominus aqua hauriatur, quum suo consensu fontem fecerit communem. ¹—2°) Aquarum, quæ prope agros vel per eos currunt, usus domino competit, qui tamen iis ita uti debet ut alios non lædat, vel eas penitus exhauriendo in suos usus, vel eas inficiendo et reddendo aliis inutiles. « Aqua currit, et currere debet, » ait lex, ideoque unumquemque ea uti oportet, quin aliorum utilitatem impediat. Nonnumquam contingit Statum aggerem jacere in flumine, vel privato alicui, aut civium collegio agerem jaciendi facere facultatem, quæ tamen ita adhibenda est, ut aquæ non desinant fluere per alveum consuetum postquam paululum ob opus aliquod utilitatis publicæ distractæ sunt. Cæterum si Status concesserit facultatem absumendi aquam in opus aliquod, ex quo inficiatur, vel si qu's per viginti annos ea usus fuerit, nemine contradicente, jus ei vindicatur. ²

Quoad sæpimentum, nemo *jure communi* tenetur agros suos sæpibus includere, et tamen unusquisque habet jus obtinendæ reparationis damnorum, quæ animalia libere vagantia intulerint, nisi habeantur specialis lex vel existat præscriptio. ³

43b. — Servitutes legales in utilitatem privatam. —
MURUS MEDIUS. — Quando est duabus domibus paries communis, si alteri e vicinis contingat necessitas eam diruendi, tenetur ad eam iterum quamprimum ædificandam, cui tamen alter partem æqualem impensarum conferre debet. Quod si alter eam altius efferat, vel majoribus impensis quam par est, suis solvit sumptibus excessum. Monere debet etiam vicinum suæ intentionis, ut hic sibi caveat, ne ex pariete diruta aliquid patiatur damni : quod si evenerit ex rei necessitate, post monitionem nulla erit obligatio illud reparandi damnum. Murus autem qui separat agros dominorum habetur utriusque, si uterque eo utatur, qui ideo dimidiæ partis muri et soli in quo exstructus est censetur dominus. ⁴

SEPES aliquando communes sunt, ideoque communibus utriusque domini sumptibus reparandæ. ⁵

DE LUMINUM nihil legibus statutum habetur : sed cuique permittitur fenestras in suis ædibus aperire, licet in alienum atrium vel fundum directas, vel murum in suo solo erigere,

1. Kenrick, II, n. 103.

2. Kenrick, II, n. 100 ; Konings, n. 687.

3. Kenrick, II, n. 99 ; Konings, n. 686.

4. Kenrick, II, n. 98 ; Konings, n. 685.

5. Kenrick, II, n. 99.